

古今文綜

野居書肆

古今文綜 第三部 碑文墓銘之屬

第二十冊

目錄

第二編 墓銘類

第二章 墓銘之體製下

(乙)德行

宋歐陽修徂徠石先生墓誌銘

宋歐陽修胡先生墓表

宋程顥邵康節先生墓誌銘

清曾國藩湘陰郭府君墓志銘

清曾國藩新寧劉君墓碑銘

清張裕釗誥贈奉政大夫山東長山縣知縣黎府君墓表

(丙)節烈

清王猷定錢烈女墓誌

清汪琬烈婦周氏墓表

清曾國藩仁和邵君墓志銘

清譚獻魏烈女墓碣

清張裕釗汝南通判馬府君墓表

清張裕釗廬江吳徵君墓表

(丁)學業

唐韓愈施先生墓銘

唐韓愈貞曜先生墓誌銘

唐韓愈南陽樊紹述墓誌銘

宋歐陽修梅聖俞墓誌銘

宋歐陽修故霸州文安縣主簿蘇君墓誌銘

清王昶惠定宇先生墓誌銘

清姚鼐抱犢山人李君墓誌銘

清惲敬彭澤縣教諭宋君墓誌銘

清曾國藩鄧湘臬先生墓表

清曾國藩苗先麓墓志銘

清吳汝綸姚慕庭墓誌銘

(戊)藝術

唐韓愈殿中侍御史李君墓誌銘

唐柳宗元箏郭師墓誌

清黃宗羲王征南墓誌銘

清方苞陳馭虛墓誌銘

清沈德潛王耕煙墓志銘

清包世臣邵生碣文

清方履錢鄧完白先生墓表

(己) 方外

(一) 道士

梁簡文帝陶貞白先生墓誌銘

宋蘇軾陸道士墓誌銘

(二) 女道士

唐符載廬山故女道士梁洞微石碣銘

(三) 和尚

唐權德輿唐故洪州開元寺石門道一禪師塔銘

唐柳宗元南嶽雲峯和尚塔銘

清汪琬中峯曉菴了法師塔銘

(四)尼

唐楊休烈比邱尼惠源和尚神空誌銘

唐權德輿唐故潤州昭代寺比邱尼元應墓誌銘

(庚)婦人

北周庾信周譙國公夫人步陸孤氏墓誌銘

北周庾信周趙國公夫人紇豆陵氏墓誌銘

唐白居易唐河南元府君夫人滎陽鄭氏墓誌銘

宋王安石曾公夫人萬年縣太君黃氏墓誌銘

宋王安石鄭公夫人李氏墓誌銘

清洪亮吉崔君妻莊孺人壙誌

(辛)生壙

清姚鼐實心藏銘

清譚獻僧月印生壙志

王先謙李爰得生壙志銘

(壬)遷葬

北魏失名氏魏故寧朔將軍固州鎮將鎮東將軍漁陽太守宜陽子司馬元興

墓誌銘

唐權德輿唐故尚書工部員外郎贈禮部尚書王公改葬墓誌銘

唐柳宗元故襄陽丞趙君墓誌銘

(癸)合葬

明唐順之賀氏孫楊二妻墓誌銘

清陳瑚孝子呂石英節婦龔氏生死合壙誌銘

清孫星衍國子監生洪先生妻蔣氏合葬壙誌

清方東樹國學生劉公應台暨德配旌節孝吳太夫人合葬墓誌銘

清曾國藩台洲墓表

清曾國藩大界墓表

古今文綜

第三部

碑文墓銘之屬

第二十冊

杭縣張相讓錄

杭縣姚漢章閱訂

第二編 墓銘類

第二章 墓銘之體製下

(乙)德行 道學之傳別於儒林善人之重稱爲國紀德邁乎一世行高乎衆人有道之碑何其懿也錄永叔石先生墓誌銘以下凡六首

宋歐陽修徂徠石先生墓誌銘

徂徠先生姓石氏名介字守道兗州奉符人也徂徠魯東山而先生非隱者也其仕嘗位於朝矣魯之人不稱其官而稱其德以爲徂徠魯之望先生魯人之所尊故因其所居山以配其有德之稱曰徂徠先生者魯人之志也先生貌厚而氣完

學篤而志大。雖在畎畝。不忘天下之憂。以爲時無不可爲。爲之無不至。不在其位。則行其言。吾言用。功利施於天下。不必出乎己。吾言不用。雖獲禍咎。至死而不悔。其遇事發憤。作爲文章。極陳古今治亂成敗。以指切當世賢愚善惡。是是非非。無所諱忌。世俗頗駭其言。繇是謗議喧然。而小人尤嫉惡之。相與出力必擠之死。先生安然不惑。不變曰。吾道固如是。吾勇過孟賁矣。不幸遇疾以卒。旣卒。而姦人有欲以奇禍中傷大臣者。猶指先生以起事。謂其詐死而北走契丹矣。請發棺以驗。賴天子仁聖。察其誕。得不發棺。而保全其妻子。先生世爲農家。父諱丙。始以仕進。官至太常博士。先生年二十六。舉進士甲科。爲鄆州觀察推官。南京留守推官。御史臺辟主簿。未至。以上書論赦。罷不召。秩滿。遷某軍節度掌書記。代其父官於蜀。爲嘉州軍事判官。丁內外艱。去官。垢面跣足。躬耕徂徠之下。葬其五世未葬者七十喪。服除。召入國子監直講。是時兵討元昊。久無功。海內重困。天子奮然思欲振起威德。而進退二三大臣。增置諫官。御史所以求治之意甚銳。先生躍然喜曰。此

盛事也。雅頌吾職其可已乎。乃作慶曆聖德詩以褒貶大臣。分別邪正。累數百言。詩出。太山孫明復曰。子禍始於此矣。明復先生之師友也。其後所謂奸人作奇禍者。乃詩之所斥也。先生自閒居徂徠。後官於南京。常以經術教授。及在太學。益以師道自居。門人弟子從之者甚衆。太學之興。自先生始。其所爲文章。曰某集者若干卷。曰某集者若干卷。其斥佛老時文。則有怪說。中國論曰。去此三者。然後可以有爲。其戒姦臣宦女。則有唐鑑曰。吾非爲一世監也。其餘喜怒哀樂。必見於文。其辭博辨雄偉。而憂思深遠。其爲言曰。學者學爲仁義也。惟忠能忘其身。惟篤於自信者。乃可以力行也。以是行於己。亦以是教於人。所謂堯舜禹湯文武周公孔子。孟軻揚雄韓愈氏者。未嘗一日不誦於口。思與天下之士皆爲周孔之徒。以致其君爲堯舜之君。民爲堯舜之民。亦未嘗一日少忘於心。至其違世驚衆人或笑之。則曰。吾非狂癡者也。是以君子察其行而信其言。推其用心而哀其志。先生直講歲餘。杜祁公薦之天子。拜太子中允。今丞相韓公又薦之。乃直集賢院。又歲餘。始

去太學通判濮州。方待次於徂徠。以慶曆五年七月某日卒於家。享年四十有一。友人廬陵歐陽修哭之以詩。以謂待彼謗焰熄。然後先生之道明矣。先生既歿。妻子凍餒不自勝。今丞相韓公與河陽富公分俸買田以活之。後二十一年。其家始克葬先生於某所。將葬。其子師訥與其門人姜潛杜默徐遁等來告曰。謗焰熄矣。可以發先生之光矣。敢請銘。某曰。吾詩不云乎。子道自能久也。何必吾銘。遁等曰。雖然。魯人之欲也。乃爲之銘曰。

徂徠之巖巖。與子之德兮。魯人之所瞻。汝水之湯湯。與子之道兮。逾遠而彌長。道之難行兮。孔孟亦云遑遑。一世之屯兮。萬世之光。曰。吾不有命兮。安在夫桓魋與臧倉。自古聖賢皆然兮。噫。子雖毀其何傷。

宋歐陽修胡先生墓表

先生諱瑗。字翼之。姓胡氏。其上世爲陵州人。後爲泰州如皋人。先生爲人師。言行而身化之。使誠明者達。昏愚者勵。而頑傲者革。故其爲法嚴而信。爲道久而尊。師

道廢久矣。自明道景祐以來。學者有師。惟先生暨泰山孫明復。石守道三人而先。生之徒最盛。其在湖州之學。弟子去來常數百人。各以其經轉相傳授。其教學之法最備。行之數年。東南之士莫不以仁義禮樂爲學。慶曆四年。天子開天章閣。與大臣講天下事。始慨然詔州縣皆立學。於是建太學於京師。而有司請下湖州。取先生之法以爲太學法。至今著爲令。後十餘年。先生始來居太學。學者自遠而至。太學不能容。取旁官署以爲學舍。禮部貢舉歲所得士。先生弟子十常居四五。其高第者知名當時。或取甲科。居顯仕。其餘散在四方。隨其人賢愚。皆循循雅飭。其言談舉止。遇之不問。可知爲先生弟子。其學者相語稱先生不問。可知爲胡公也。先生初以白衣見天子。論樂。拜祕書省校書郎。辟丹州軍事推官。改密州觀察推官。丁父憂去職。服除。爲保寧軍節度推官。遂居湖學。召爲諸王宮教授。以疾免。已而以太子中舍致仕。遷殿中丞於家。皇祐中。驛召至京師。議樂。復以爲大理評事。兼太常寺主簿。又以疾辭。歲餘。爲光祿寺丞。國子監直講。迺居太學。遷大理寺丞。

賜緋衣銀魚。嘉祐元年。遷太子中允。充天章閣侍講。仍居太學。已而病不能朝。天子數遣使者存問。又以太常博士致仕。東歸之日。太學之諸生與朝廷賢士大夫。送之東門。執弟子禮。路人嗟歎。以爲榮。以四年六月六日卒於杭州。享年六十有七。以明年十月五日。葬於烏程何山之原。其世次官邑。與其行事。莆陽蔡君謨具誌於幽堂。

嗚呼。先生之德在乎人。不待表而見於後世。然非此無以慰學者之思。乃揭於其墓之原。

宋程顥邵康節先生墓誌銘

熙寧丁巳孟秋癸丑。堯夫先生疾終於家。洛之人弔者相屬於塗。其尤親且舊者。又聚謀其所以葬。先生之子泣以告曰。昔先人有言。誌於墓者。必以屬吾伯淳。噫。先生知我者。以是命我。我何可辭。謹按邵本姬姓。系出召公。故世爲燕人。大王父令進。以軍職逮事藝祖。始家衡漳。祖新父古。皆隱德不仕。母季氏。其繼楊氏。先生

之幼。從父徙共城。晚遷河南。葬其親於伊川。遂爲河南人。先生生於祥符辛亥。至是蓋六十七年矣。雍先生之名。而堯夫其字也。娶王氏。伯溫仲良。生二子也。先生之官。初舉遺逸。試將作監主簿。後又以爲潁州團練推官。辭疾不赴。先生始學於百原。勤苦刻厲。冬不爐。夏不扇。夜不就席者數年。衛人賢之。先生歎曰。昔人尙友於古。而吾未嘗及四方。遽可已乎。於是走吳。適楚。過齊魯。客梁久之而歸。曰。道其在是矣。蓋始有定居之意。先生少時自雄其才。慷慨有大志。旣學力慕高遠。謂先王之事爲可必致。及其學益老。德益劭。玩心高明。觀天地之運化。陰陽之消長。以達乎萬物之變。然後頽然其順。浩然其歸。在洛幾三十年。始也蓬簞環堵。不蔽風雨。躬爨以養其父母。居之裕如。講學於家。未嘗強以語人。而就問者日衆。鄉里化之。遠近尊之。士人道之。來之洛者。有不之公府而必之先生之廬。先生之德氣粹然。望之可知。其賢然不事表襮。不設防畛。正而不諒。通而不行。清明坦夷。洞徹中外。接人無貴賤。親疎之間。羣居燕飲。笑語終日。不甚取異於人。顧吾取樂如何耳。

病畏寒暑。常以春秋時行遊城中。士大夫家聽其車聲。倒屣迎致。雖兒童奴隸。皆知懽喜尊奉。其與人言。必依於孝弟忠信。樂道人之善。而未嘗及其惡。故賢者悅其德。不賢者服其化。所以厚風俗成人材者。先生之功多矣。昔七十子學於仲尼。其傳可見者。惟曾子所以告子思。子思所以授孟子者耳。其餘門人各以其材之所宜爲學。雖同尊聖人所因而入者。門戶則衆矣。況後此千餘歲。師道不立。學者莫知其從來。獨先生之學爲有傳也。先生得之於李挺之。挺之得之於穆伯長。推其源流。遠有端緒。今穆李之言及其行事。概可見矣。而先生淳一不雜。汪洋浩大。乃其所自得者多矣。然而名其學者。豈所謂門戶之衆。各有所因而入者歟。語成德者。昔難其居。若先生之道。就所至而論之。可謂安且成矣。先生有書六十卷。命曰皇極經世。古律詩二千篇。題曰擊壤集。先生之葬。祔於先塋。實其終之年。孟冬丁酉也。銘曰。

嗚呼先生。志豪力雄。闊步長趨。凌高厲空。探幽索隱。曲暢旁通。在古或難。先生從

容有問有觀。以飫以豐。天不憖遺。哲人之凶。鳴皋在南。伊流在東。有寧一宮。先生所終。

清曾國藩湘陰郭府君墓志銘

君諱家彪。字春坊。郭氏。湘陰人。生而溫約夷愉。與人無競。不苟爲和。翕亦不爲介。介蹕異之行。卒然投之事。變若不克辨。其是非曲直也者。及夫羣疑劫劫。徐出一言。折之。關開節解。風生冰釋。雖強辯者。常默然而內自詘也。曾祖遇傑。貤贈奉直大夫。祖熊貢生。誥贈奉直大夫。考詮。世縣學生。世父世遵。縣學廩膳生。世遵無子。以諸子家噉爲嗣。早世。乃復以君爲嗣。家故饒贍。諸父豪宕好施。或日費數十萬錢。無所惜。君亦夷然不爲有。亡顧慮。親故假貸。每盈其意。或他人相稱貸。要君一言爲質。及期責償於君。輒量償之。又急則又旅歸之。歲中爲人理宿逋。率三四役久之。往往不讐。則毀其約契。會歲大祲。家以中圯。君故夙於澹泊。豐約不以易其度。布衣糲食。蕭然自得。益務濟人。廣儲方藥。病者踵門求乞。手劑與之。自尋常草